

## **EBBALUWA EERI AB'EBBULANIYA Enyanjula**

*Ebbaluwa eeri ab'Ebbulaniya*, bagiwandiikiire mu kibuga ky'e Looma (13:24) era kyezyeka okubba nga bagisalaanirye omu makanisa ageeraku. Mpaawo amaite eyawandiikire ebbaluwa eenu ooba ebiseera ebibagiwandiikiramu. Abakugu omu by'eBbaibbuli bateeserera ku mutume oPawulo, n'oLuuka, ooba oBbalunaba. Era abakira obungi, baikirirya bati bagiwandiikire ng'omwanka gwa 70 gukaali okubitawo nga bamalire okubyala oKurisito.

Ebbaluwa eenu bagiwandiikire ooti isomo, era ekigendererwa kyayo kyabbaire ky'okwiryamu Bayudaaya abaikirirya maani. Ebbaluwa eenu, eraga ng'oYesu oweyatuukirirye obunaabbi obweraku obw'eNdagaano eNkaire. Ekyo oYesu yakikolere, oweyeewaireyo okubba niye esadaaka y'ebikole ebibbibbi omulundi ogumo lumala, era ng'ekola ekiseera kyonakiyona. Ebbaluwa eenu eijulira eBiwandiike by'omu Ndagaano eNkaire ooti 60. Era eBiwandiike ebyo biraga engeri oYesu egiyatuukirirye obunaabbi n'obuvunaanyizibwa bwa kabona akira obukulu ow'eKiyudaaya.

Abaikirirya omu kiseera kinu, bayezya bona okwajirya ekibairiyamu amaani omu bbaluwa eenu ni basigala nga basengererya oKurisito

Yesu nga niiye atwezyesya iswe okwesiga oKibbumba naiye (12:2).

### **Engeri egibyecaanamu**

1. OYesu akiraku abanaabbi ba Kibbumba n'abamalaika (1:1-4:13).
2. OYesu akiraku abakabona abaweererya omu Yeekaalu ya Kibbumba omu Yerusalemi (4:14-7:28).
3. Obuweererya bwa Yesu bukiraku obw'eNdagaano eNkaire (8:1-10:31).
4. Ebibono ebyokulungamya (10:32-13:17).
5. Ebibono ebisembayo (13:18-25).

### *OKibbumba atumwire kubitira mu Mwanawe*

<sup>1</sup> Eira, oKibbumba yatumulanga n'abazeiza baiswe emirundi n'emirundi era omu ngeri enyingi ng'abitira mu banaabbi.

<sup>2</sup> Neye omu biseera ebyaiswe binu eby'enkomerero atumwire na iswe kubitira mu Mwanawe, oguyalondere okuwa obusika bwa buli kimo, era oguyabitiiremu okubbumba ekyalo.

<sup>3</sup> Mwiye niimwo okwasya kw'ekitiisya kya Kibbumba omu kweraga, era mwiye mutubonera enfaanana ya Kibbumba enanyere. Niiye abbesyawo\* buli kimo n'amaani g'ekibonokye. Oweyamalire okutunaabyaku ebibbibbi byaiswe, n'atyama omwigulu n'oKibbumba onyere oBwezye omu kifo ky'ekitiisya eino.†

---

\* **1:3 1:3** Ooba, Akwatirira. † **1:3 1:3** Ekifo ky'ekitiisya eino, ooba, Oku lubba olw'engalo endiuro eya Kibbumba. **1:3 1:3 1:13; 8:1; 10:12; 1Ba 2:19; Zab 110:1; Bik 2:34; Bef 1:20**

*OMwana akira abamalaika ekitiisya*

<sup>4</sup> OMwana oyo ekitegeeza, oKibbumba yamusuucirye ow'amaani eino okukiraku abamalaika omu ngeri nti, ekitiisya ekiyamuwaire eky'okubba oMwanawe kikira ekyabwe.

<sup>5</sup> Aale naani oku bamalaika oKibbumba oguyabbaire akobereku ati:

"Oli Mwana wange,  
olwatyanu nnangirira nti ndi Iteewo?"

Ooba ati:

"Nalibba ninze oIteeye,  
yena n'abba Mwana wange?"

<sup>6</sup> Kaisi tete era, oKibbumba oweyabbaire yatira okusindika oMwanawe omubere oku kyalo, yakobere ati:

"Abamalaika ba Kibbumba bonabona bamusinze."

<sup>7</sup> Owaabba atumula ku bamalaika, oKibbumba akoba ati:

"Asuuca abamalaikabe ooti mpewo,  
era abaweereryabe ooti ndimi gya musyo."

<sup>8</sup> Neye owekituuka oku Mwanawe, oKibbumba akoba ati:

"Obwakabaka oKibbumba obwakuwaire  
bwakubbaawo emirembe n'emirembe.  
Okufugakwo omu bwakabakabwo kutambulira ku bwenkanya.

<sup>9</sup> Otaka ebikole by'obutuukirirye, n'ocaawa obubbibubbi.

Kagira nze oKibbumba, oyo oKibbumbawo nkusukireku amafuta

ni nkuwa eisangaalo erikira ery'abandi bonabona.”

10 Era oKibbumba yakobere ati:

“Iwe Musengwa niiwe omu ntandiika eedi eyakomekere omusingi ekyalo oku kye-mereire,

era n'eigulu niiwe onyere eyalibbumbireyo.

11 Ebyo ibyo byalijirika ni biwaawo, neye iwe oli wa kubbaawo emirembe n'emirembe.

Byonabyona byalikairira ni biwaamu ng'ekizwalo.

12 Walibiringaku ng'owebalingaku eijoola,

era byalicucuka ni bicuuka ooti kizwalo ekikaire owekicucuka.

Neye iwe osigala kyekimo, era tocuukaku,

era n'obwomibwo tibwalikoma.”

13 Neye aale naani oku bamalaika oKibbumba ogwakobangaku ati:

“Otyame ng'ondiraine oku lubba lwange olw'engalo endiirō,‡

paka owenaligondya abalabebo

ni mbasuuca mukonkolo gw'okuwuumuliryaku ebigerebyo?”

14 Neso abamalaika nago niikyo eniki? Aale tiniigyo emyoyo gyonagyona egiweererya oKibbumba, egyo egyatuma okubbeera abo abalisuna okubalokola?

## 2

### *Titwalekerera obulokole obw'amaanimaani*

---

1:10 1:10 Zab 102:25-27 ‡ 1:13 1:13 Ooba, *Ofugire aamo na nze.* 1:13 1:13 Zab 110:1

<sup>1</sup> N'olwekyo tusaaniire twekalangulire oku njegesya egitwasunire, kaisi awo tuleke okugizwaku.

<sup>2</sup> Nti kyazuukire ng'obukwenda bwa Kibbumba abamalaika obubaleetere owebuli n'obukakafu. Era, abo bonabona abanandi babwabiraku n'abagaina okubukwata basunire ekibonerezo ekibasaanira.

<sup>3</sup> Kaisi tete olwo iswe? Twalyezya tutya aale okulama okutubonereza ng'owekitusaanire swena, singa titwateekeyo omwoyo oku bukwenda obukwata oku kulokoka obw'amaanimaani obutyo? Obukwenda obwo, oMusengwa onyere niiye eyasookere okubumanyikisya abantu, era abo abawuliire ng'abumanyikisya babukakasire egituli ng'owebuli bw'amazima.

<sup>4</sup> Era oKibbumba yeeyongeire okukakasa obukwenda bwabwe okubita omu bumanyiciryo, n'ebyewunyo, n'ebyamagero ebitali bimo, era n'okugaba ehirabo bya Mwoyo oMutukulye, okusinzirira oku kutakakwe.

### *OYesu omu buntubwe*

<sup>5</sup> Nti okufuga ekyalo ekyo ekiiza okubbaawo omumaiso, ekyo ekituli kutumulaku, oKibbumba tiyakukwatisirye bamalaika.

<sup>6</sup> Neye era, eeriyo awantu omu Biwandiike egikiijulira, nga waliwo akoba ati:

“Omuntu niikyo eniki-so ekigira n'omuseegaku?  
Era omuntu-obuntu, lwaki omulumirwa?”

7 Wamukolere n'abulaku katyayi kati,\* okwagaagana n'abamalaika; era n'omutiikira engule ey'ekitiisya n'okumugulumalya.†

8 Ebintu byonabyona wabiteekere ansi w'obwezyebwe.”

Atyanu, omu kuteeka ebintu byonabyona ansi w'obwezyebwe, oKibbumba mpaawo kintu kadi kimo ekyatamukwatisirye okufuga. Neye era wona n'atyanu, titubona ng'ebintu byonabyona biri ansi w'obwezyebwe.

9 Wazira ogutubona Yesu, iye oyo ogubakolere n'abba, okumala akaseera katyayi kati, ng'abulwaku okwagaagana abamalaika. Era, atyanu niiye ogubatiikiire obugulumali n'ekitiisya olw'okubba yabitire omu kufa kaisi, olw'ekisa kya Kibbumba, ayezye okufeererera abantu bonabona.

10 OKibbumba, eyabbumbire era abbesyawo ebintu byonabyona okululwe, yaboine nga kisaaniire okutuukirirya oYesu kubita mu kugada atuce abaanabe abangi oku kulokoka, batyo bagabane omu kitiisya.

11 Nti abo abebasuuca abatukulye n'oyo abasuuca abatukulye bonabona oitewaabwe niiye omoiza onyere oyo. Kagira oYesu tikimukwatisya nsoni okubeeta aboluganda.

12 Akoba ati:

---

\* 2:7 2:7 *abulaku katyayi kati* Ooba, *Okumala akaseera katyayi kati.* † 2:7 2:7 *Ebiwandiike ebimo eby'eira byongeraku biti, N'omuwa okufuga ebintu byonabyona ebiwakolere.* 2:8 2:6-8 Zab 8:4-6

“Namanyikisyanga obukulu bw’eriinalyo omu boluganda,  
era omu nkumbaana gyabwe nakuwuu-  
janga.”

<sup>13</sup> Era akoba ati:

“Neesiganga Kibbumba.”

Era ayaba omumaiso n’akoba ati:

“Ngonu ndi aanu aamo n’abaana  
oKibbumba abeyampaire.”

<sup>14</sup> N’olwekyo, ng’owekiri kiti abo oYesu abaayeta abaana, bantu abali mu mubiri, yena yeezwalisirye omubiri n’asuuka muntu nga ibo. Eyo niiyo engeri yonkani egiyeezyeryemu okufa. Era, okubita omu kufa niiyo engeri yonkani omu yeezyeirye okujigirica amaani ga Sitaani, iye aali n’obwezye oku kufa.

<sup>15</sup> N’omu ngeri eyo, n’ataisulya abo bonabona ababaire omu obwomi bwabwe bwonabwona omu bugalama obw’okutya okufa.

<sup>16</sup> Nti omu butuuce obunyere tiyaiziriire kubbeera bamalaika wazira baizukulu ba Ibbulaimu.

<sup>17</sup> N’olwekyo yabbaire n’okubbeera nakimo pulu ng’abolugandabe mu buli ngeri, kaisi abbe kabona akira obukulu ow’ekisa era omwesigwa omu kuweereryakwe omumaiso ga Kibbumba, okuwaayo esadaaka odenge eyasoniyisya abantu ebikole byabwe ebibbibbi.

<sup>18</sup> Era atyanu ayezya okubbeera abo ababita omu bikemo, olw’okubba yena onyere yabitireku omu bikemo aamo n’okugada.

### 3

#### *OYesu akira oMusa*

<sup>1</sup> Kale boluganda omu Kurisito era abatukulye abeyayeteire obwomi bw'omwigulu, muteeke ebiseego byanywe ku Yesu omutume wa Kibbumba, era okabona akira obukulu ow'enjikirirya yaiswe.

<sup>2</sup> Yabbaire mwesigwa eeri oKibbumba, eyamulondere okukola omulimo ogwo, dala ng'oMusa oweyabbaire omwesigwa omu kuweererya abantu ba Kibbumba bonabona.

<sup>3-4</sup> Atyanu, oKibbumba niye eyakolere buli kimo okubba ng'owekiri. Kintu kimanye kiti buli nyumba ebbaawo wabba waliwo eyagyombekere. Kale, ng'omwombeki w'enyumba owaabba n'ekitiisya ekikira eky'enyumba egyayombekere, n'oYesu atyo webamutwala okubba asaaniire ekitiisya ekikiraku eky'a Musa.

<sup>5</sup> OMusa yabbaire mwesigwa ng'omuweererya omu nyumba ya Kibbumba okumalaku, ng'akakasa abantu baamu ebyo oKibbumba ebiyalitumula omumaiso eeyo.

<sup>6</sup> N'oKurisito yena atyo weyabbaire omwesigwa wazira ng'oMwana akulira enyumba ya Kibbumba. Era, iswe niiswe enyumba ya Kibbumba nago, kasita twasigala bulijo nga tuli bacaati era nga tuli n'osuubi oyo ogutwenyumirizaamu.

#### *Okulabula okukwata oku kutaikirirya*

<sup>7</sup> Kale ng'oMwoyo oMutukulye owaakoba, "Olwatyanu, owemwawulira eigonolye,



- <sup>8</sup> timwakakanyalya emyoyo gyanywe  
ng'abazeiza baanywe owebakolere oku lu-  
naku  
oKibbumba oluyabagezeseirye omwidungu.
- <sup>9</sup> OKibbumba yakobere ati: 'Eeyo, bankemere ni  
bangesesya,  
waire nga babbaire baboine ebikulu ebi-  
nakolere  
okumala emyanka 40.'
- <sup>10</sup> Kagira zena nanyiigire olw'abantu  
ab'omulembe ogwo,  
ni nkoba nti,  
'Emyoyo gyabwe gitamaatama ni gigota okun-  
zwaku,  
tibategeera enkola gyange egimbakoba  
okukoleraku.'
- <sup>11</sup> N'olwekyo, niiwo okunyiiga ni ntuuka  
n'okwerima nti,  
'Tibalituuka kadi omu kifo omu  
nankabaweereire ekiwuumulo.' "
- <sup>12</sup> Kale, boluganda, aale mugenderere kaisi  
tiwaabbaawo kadi moiza kwinywe abba  
n'omwoyo omubbimubbi era omukakanyali  
ogutaikirirya, n'azwa oku Kibbumba onanyere  
obwomi.
- <sup>13</sup> Wazira, bulijo mwiryanganengemu amaani  
kasita ni kubba nga kukaali "Lwatyano," kaisi  
waleke okubbaawo waire moiza kwinywe, ek-  
ibbikibbi ogukibbeyabbeya n'akakanyalya om-  
woyogwe eeri oKibbumba.
- <sup>14</sup> Tusuuka bantu abali ekintu ekimo  
n'OKurisito singa twekalangula tutyo paka ku

nkomerero omu bwesigwa obutwabbaire nabwo nga twankatandiikanga okwikirirya.

<sup>15</sup> Ng'eKiwandiike owekikoba:

“Olwatyano owemwawulira eigonolye, timwakakanyalya emyoyo gyanywe, ng'abazeiza baanywe owebakolere.”

<sup>16</sup> Atyanu, aale banaani abo abawuliire eigonolye neye ni bamutenguwa? Tibaabo bonabona oMusa abeyeekubbembeire okubatoola omu Misiri?

<sup>17</sup> Era, aale banaani abo oKibbumba abeya-sunguwaliire okumala emyanka 40? Tibabbaire baabo ababbengere omumaisoge, abo abafiire, emirambo gyabwe ni gisigala omwidungu?

<sup>18</sup> Era, aale banaani abo abeyalayiriire ati tiyal-ibaganya okwema ekigere omu kifo ekiyabbaire abategekeire ati mubaliwuumulira? Tibaabo abamutengwire?

<sup>19</sup> Kale mwekyo tubona tuti bakayire okutuuka omu kifo oKibbumba ekiyabbaire abategekeire okuwuumuliramu, lwa kutaikirirya kwabwe.

## 4

### *Ekiwuumulo ky'abantu ba Kibbumba*

<sup>1</sup> Ekisuubizo kya Kibbumba eky'okutuuka abantube omu kifo omu yabaweera ekiwuumulo kikaali kiriwo. N'olwekyo, twegendereze tiwaabbaawo kwinywe akaya okutuuka omu kifo eky'ekiwuumulo ekyo.

<sup>2</sup> Nti swena aMawuliro aMasa agetwawuliire niigo aganyere ago aBaisirairi agebawuliire.

Okutoolaku nti, ibo ebibawuliire tityabagasire olw'okubba waire bagawuliire, tibagaikiriri-iryemu.

<sup>3</sup> Atyanu iswe abaikiririrya omu Yesu, niiswe abaingira omu kifo ky'ekiwuumulo ekyo, olw'okubba eeri abataikirirya, oKibbumba yakobere ati:

"N'olwekyo, niiwo okunyiiga ni ntuuka n'okwerima nti,  
'Tibalituuka kadi omu kifo omu nankabaweereire ekiwuumulo.' "

OKibbumba ekyo yakitumwire waire nga yabaire yamaliriirye omulimogwe, ekikoba nti, ng'okubbumba ekyalo kwabaire kuwoire.

<sup>4</sup> Tukitwala tutyo olw'okubba omu Biwandiike ebitukulye waliwo egikitumulira oku lunaku olwomusanvu kiti: "Oku lunaku olwomusanvu oKibbumba n'awuumula okuzwa oku mirimogyonagyona."

<sup>5</sup> Era tete, ananyere awo oKibbumba akoba ati: "Tibalituuka kadi omu kifo omu nankabaweereire ekiwuumulo."

<sup>6</sup> N'olwekyo, kiri nti ekifo ky'ekiwuumulo kya Kibbumba kisigala nga kiriwo abantu okukingiramu. Neye, abo abasookere okuwulira aMawuliro aMasa bakayire okukingiramu olw'okutaikirirya kwabwe.

<sup>7</sup> Kagira oKibbumba yateekerewo kiseera kindi omu yatuucirya abantube omu kifo ky'ekiwuumulo nago, ekiseera ekyo nga ni-ikyo "Olwatyanu." Ekyo yakirangiriire nga wabitirewo emyanka mingi, ng'abitira omu

kabaka oDawudi, omu bibono ebitumalire okwiji-  
julira e nyuma eeyo tuti:

“Olwatyanu, owemwawulira eigonolye,  
timwakakanyalya emyoyo gyanyowe.”

<sup>8</sup> Aale singa oYoswa yatuuciryeye aBaisirairi omu  
kifo egibabbaire babasuubizire okuwuumulira,  
oKibbumba tete tiyankatumwire oku lunaku  
olundi olw'okutuuciryaku abantu omu kiwu-  
umulo.

<sup>9</sup> N'olwekyo, okusinzirira ebintu ng'owebiri,  
wakaali waliyo ekiwuumulo eeri abantu ba Kib-  
bumba ekiri ng'ekyo iye ekiyawuumwire oku  
Saabbaato.

<sup>10</sup> Nti buli moiza aingira omu kiwuumulo  
oKibbumba ekiyasuubizire asuna okuwuumula  
omu mwoyogwe okuzwa omu kukalabana,  
ng'oKibbumba oweyawumwire okuzwa omu  
mulimo gw'okubbumba.

<sup>11</sup> N'olwekyo, tulwanikane tutuuke omu ki-  
wuumulo ekyo, kaisi awo tiwaabbaawo akaya  
okukituukamu olw'obujeemu, nga badi.

<sup>12</sup> Ekyo tukikole olw'okubba ebibono ebir-  
imu obukwenda bwa Kibbumba, byomi era biri  
n'amaani agakola. Byogi n'okukiraku empiima  
ey'obwogi obubiri. Bisala ni bingirira nakimo  
paka mu kifo kya muntu ekisembayo obubise,  
era byabulamu n'ebiseego n'okufumintiriza  
okw'omu mwoyo.

<sup>13</sup> Mpaawo kibbumbe waire kimo ekyezya  
okwebisa oKibbumba. Buli kimo kimuli

akukunali akibona, era omumaisoge gituli n'okwewozeryaku.

*OYesu niye oKabona oMukulu*

<sup>14</sup> Kale ng'owetuli n'okabona akira obukulu ow'amaani, oYesu oMwana wa Kibbumba, eyaangiire omwigulu egiri oKibbumba, tukalangulire nakimo okwikirirya kwaiswe okutwatula.

<sup>15</sup> Iye okabona akira obukulu ogutuli naye atulumirwa omu bunafu bwaiswe. Atulumirwa olw'okubba yena yabitirekuuku omu kumukema okwa buli nkola nga iswe, neye nandi n'agwa omu kibbikibbi.

<sup>16</sup> Kale, atyanu twigerere n'obumaliriri eeri entebe ya Kibbumba aizwire ekisa, era twasuna okutusaasira n'okutukwatira ekisa, era n'okutubbeera nabuli owetwetaagira.

## 5

<sup>1</sup> Buli moiza asuuka okabona akira obukulu, bamulonda kuzwa mu bantu, era bamuteekawo kubakiikirira mumaiso ga Kibbumba. Ekikoba kiti, niye awaayo ebirabo n'esadaaka eeri oKibbumba oku lw'ebibbibibbi byabwe.

<sup>2</sup> Engeri yena onyere egyali munafu omu ngeri enyingi, ayezya okukwata n'eiwooyo abo abali omu kutamanya n'abo abagota.

<sup>3</sup> Ekyo niikyo ekigira asaaniire okuwaayo esadaaka olw'ebibbibibbi ebibye n'olw'ebibbibibbi eby'abandi.

<sup>4</sup> Kaisi nago, mpaawo muntu ayezya okwetakirya era ni yeewa ekitiisya kya kabona akira obukulu. OKibbumba onyere niye

yenkani alonda omuntu okubba okabona, ng'oweyalondere Alooni okabona akira obukulu eyasookere.

<sup>5</sup> Eyo niiyo ensonga lwaki oKurisito tiyeeniirye yenkani okwewa ekitiisya kya kabona akira obukulu, wazira oKibbumba niye eyakimuwaire oweyamukobere ati:

“Oli Mwana wange,

olwatyanu nnangirira nti ndi Iteewo.”

<sup>6</sup> Era n'awantu awandi oKibbumba akoba ati:

“Oli kabona ow'emirembe n'emirembe,

okufaanaku n'oMerikizedeki  
ng'oweyabbaire kabona.”

<sup>7</sup> OYesu oweyabbaire oku kyalo kunu yasabanga oKibbumba era n'amwegairira omwigono eryaminkirira n'omu maliga ati, iye aali n'obwezye okumulamy okufa, amulamy. Era, olw'obugondi n'obumaliriri ebiyabbaire nabyo eeri oKibbumba, bamuwuliire.

<sup>8</sup> Newankubbaire nga yabbaire Mwana wa Kibbumba, yayegere okubba omugondi, ekyo ng'akyegera mu kugada okuyabitiremu.

<sup>9</sup> N'olw'okuwangula ebikemo n'okukaanya okugada, oKibbumba atyo n'amubitya okubba okabona akira obukulu atuukiriire, n'asuuka niye onsulo w'okulokoka okutawaawo eeri abo bonabona abamugondera.

<sup>10</sup> Ekyo kityo olw'okubba oKibbumba yamusu-ucirye kabona akira obukulu okufaanaku n'oMerikizedeki ng'oweyabbaire kabona.

### *Okulabula oku kuzwa omu njikirirya*

<sup>11</sup> Waliwo bingi ebitwankatakire okutumulirira oku nsonga eenu ey'okugeraagerania obwakabona bwa Yesu n'obwa Merikizedeki. Neye, engeri egimulwawo okutegeera ensonga, tibyangu byokubasonzolera.

<sup>12</sup> Nti neso waire ng'atyanu mwankubbaire basomesya b'abandi, paka atyanu nywena mukaali mwetaaga muntu kubeegesya-bwegesi ebyo ebyangubyangungu ebyokusookeraku omu kutegeera obukwenda bwa Kibbumba. Mukaali musaanira kunywa mata, neye tikulya kyokulya ekikalanguki!

<sup>13</sup> Buli moiza akaali asaanira amata abba akaali kiweigera, ekikoba kiti, tayezya kumanya enjawulo eriwo aakati w'ekintu ekituuce n'ekitali kituuce.

<sup>14</sup> Neye ekyokulya ekikalanguki kisaanira bantu baabo abakakatire okubita omu kukiryanga nenca, era abeegere okumanya n'okwabalawo aakati w'ekintu ekisa n'ekibbikibbi.

## 6

<sup>1</sup> N'olwekyo, tuzwe oku nsonga enyangunyangu egibasookeraku omu njegesya y'obukurisitaayo. Wazira, tweyongereyo twege ebikiraku awo ebikakati ebisaanira abantu abakulu. Titwabba ooti bantu abairamu okwombeka omusingi, ekikoba kiti, twireirenge mu kwegesya lwaki kikulu okwenenya n'okwikirirya oKibbumba.

<sup>2</sup> Tikyetaagisya tusigalire mu kubeegesyanga ku bikwata oku kubatiza, n'okuteeka engalo oku mitwe gy'abantu, n'okuzuukira, n'oKibbumba okusalira abantu omusango ekibitegeeza.

<sup>3</sup> Kale tuzwe omu by'ekitokito era, oKibbumba oweyaganya, ekyo kitwakola.

<sup>4-5</sup> Kaisi eeriyo abo ababbaire bategeireku oku mazima ga Kibbumba, era abo abeewulirirekuuku mwibo ekirabo ekizwa omwigulu, era ni bagabana n'oku Mwoyo oMutukulye. Nkoba baabo abalegerekuuku obusa obuli omu bukwenda obuzwa eeri oKibbumba, era ni beeboneseryaku n'amaani ga Mwoyo wa Kibbumba agaaba okubbaawo omu mirembe egiiza. Neye era, ni bairirira ni babizwamu, ni bagwa.

<sup>6</sup> Ala ab'engeri abo tikyezyeka okubairyawo omu kwenenya, olw'okubba okwegaana oMwana wa Kibbumba okubabba bakola kyekimo babba ng'abairamu kumukomerera ku musalabba na kumuswaza mulwatu.

<sup>7</sup> Eitakali owerinywa amaizi ga ikendi agwaku emirundi emingi, ni liwa abo abalirimiraku eimerera erisa, awo libba n'enkabi gya Kibbumba.

<sup>8</sup> Neye oweriwuluca mawa na isubi, awo libba mpaawo kirigasa, era libba lituukire kulikubba kiraami, n'ekyazwamu kulikumaku musyo.

<sup>9</sup> Neye era wona, bainange abatake eino, waire nga tuli kubakoba ebibono ebityo, inywe tubabulamu kubuusabuusa ng'owemuli omu mbeera ensa. Tumaite tuti enzira egimwakwata niiyo



eyo eyeetaagisya okubatuuca oku bintu ebiki-raku obusa, ebyo ebiiza n'obulokole.

<sup>10</sup> Iye Kibbumba abba mwenkanya buli kiseera, n'olwekyo tiyeerabire omulimo ogumwakolere. Era tiyeerabire n'okutaka okumwamulagire okubitira omu bubbeeri obumwawaire, era obumwekalangula okuwa abatuukirirye.

<sup>11</sup> Era tutaka buli moiza mwinywe, alage okwekalangula okwo paka ku nkomerero, kaisi ayezye okubba n'obukakafu bw'okusuna ekyo ekimusubira.

<sup>12</sup> Owemwakola ekyo, mubba timwasuukenge abagayaali, wazira mwabba bantu abeegererya badi abasikira ebyo ebibasubizire, olw'okwikirirya kwabwe n'okuguminkiriza.

### *Obukakafu bw'ekisubizo kya Kibbumba*

<sup>13</sup> OKibbumba oweyabbaire asubiza oIbbulaimu, yalayiire mu liina erirye iye onyere. Ekyo yakikolere olw'okubba tiwabbairero muntu gondi amukiraku aali n'eriina eriyankakoleserye okulayira.

<sup>14</sup> Yakobere ati, "Dala nalikuwa enkabi, era ni nnyongera obungi bw'ab'ekiizukulukyo."

<sup>15</sup> Era oluzwanyuma lw'okuguminkiriza, oIbbulaimu yasunire ekyo oKibbumba ekiyamusuubizire.

<sup>16</sup> Abantu owebabba balayiranganira, balayirira mu liina ly'ekintu ekiri n'amaani agakiraku agaibo, era ekirayiro niikyo ekisala empaka gyabwe gyonagyona.

17 Kale atyo oKibbumba yena kagira yalayiire, kaisi awo akikakasire nakimo eeri abo abalisuna ebiyasuubizire ati dala yalibituukirirya.

18 Mwekyo oKibbumba ekiyakolere, mulimu ebintu bibiri ebitacuasika, era omwotoyezya kubbeyera, ekisuubizokye n'ekirayiro. N'olwekyo iswe abairukiire egyali okunoonia obutyami mwiye twiramu ino amaani okwekalangulira omu bukakafu bw'okusuna ekyo ekitunuwirira okusuna.

19 Obukakafu obwo niibwo obukwatirira ni bugumirya nakimo emyoyo gyaiswe okutayuu-gayuuga. Era, obukakafu obunyere obwo ni-ibwo obututuuca n'okwingirira nakimo omunda omu kifo ekitukulye omu weema e nyuma w'olutimbe.

20 Eeyo niiyo oYesu egiyatwesookere okwingira okulwaiswe, awo ng'amalire okusuuka ok-abona akira obukulu ow'emirembe n'emirembe okufaanaku n'oMerikizedeki ng'oweyabbaire kabona.

## 7

### *Obwakabona bwa Merikizedeki*

1 OMerikizedeki oyo yabbaire kabaka w'ekibuga ky'e Saalemu neenu nga kabona wa Kibbumba oNambulaku aMwagaagana. Niiye eyasengeseryeku oIbbulaimu oweyabbaire azwa omu lutalo ludi iye n'abalwanibe omu baitiire abakabaka abana n'amaje gaabwe, era n'amuwa enkabi.

<sup>2</sup> Era, oIbbulaimu yamuwaireku ekitundu kimo okwikumi eky'ebyo byonabyona ebiyabbaire awambire omu lutalo.

Atyanu ekisooka, eriinalye oMerikizedeki litegeeza "Okabaka afugira omu butuukirirye." Kaisi tete, n'engeri ekibono "Saalemu," egikitegeeza "Idembe," amakulu g'ekitiisyyakye niigo nti, "Okabaka ow'eidembe."

<sup>3</sup> Mpaawo egibatumulira okwiteeye ooba omaaye wa Merikizedeki oyo, waire oku lulyo n'obwomibwe egibutandiikira n'egibukoma. Neye era wona, okufaanaku n'oMwana wa Kibumba, oMerikizedeki yena asigala nga kabona emirembe n'emirembe.

<sup>4</sup> Aale mwezya okubona ng'oMerikizedeki oweyabbaire muntu w'amaani nakimo. Obona n'oIbbulaimu ozeiza waiswe omukulu yamuwaire ekitundu ekimo okwikumi eky'ebyo ebiyabbaire awambire omu lutalo!

<sup>5</sup> Atyanu, aMateeka ga Musa galagira abo ab'ekiizukulu kya Leevi abebawaire obwakabona, okusooloja omu bantu ekitundu ekimo okwikumi waire nga b'olulyo lwabwe, nti bonabona baizukulu ba Ibbulaimu.

<sup>6</sup> Neye oMerikizedeki iye etiyabbaire w'ekiizukulu kya Leevi, obone oweyatoire okwIbbulaimu ekitundu ekimo okwikumi. Kaisi era, n'okumuwa n'amuwa n'enkabi, iye oIbbulaimu oKibumba oguyabbaire amalire ira okusuubiza.

<sup>7</sup> Mpaawo kubuusabuusa nti omuntu akiraku, niye awaaku abo abaakiraku enkabi.

<sup>8</sup> Owetutumula oku ky'abakabona okusooloja ekitundu ekimo okwikumi omu bantu, bakisolooja ng'abali n'emibiri egifa. Neye owekituuka oku Merikizedeki iye, eyasunire ekitundu ekimo okwikumi mwomi, dala ng'eBiwandiike owebikoba.

<sup>9</sup> Atyanu eeriyo ayezya okukoba ati, mbona n'ab'ekiizukulu kya Leevi abebawa ekitundu ekimo okwikumi bona kyekimo bakitooleire aamo n'oIbbulaimu okukiwa oMerikizedeki.

<sup>10</sup> Ekyo kityo olw'okubba oIbbulaimu okwaba okuwa oMerikizedeki ekitundu ekimo okwikumi oweyamusangaine, n'oLeevi onyere yena yabaire akaali ali mu kida kya zeizawe oIbbulaimu, nga bakaali kumubyaala.

*OYesu ali ooti Merikizedeki*

<sup>11</sup> Atyanu, oKibbumba yawaire aBaisirairi aMateeka ga Musa nga geemereire ku musingi gw'obwakabona bw'aBaleevi. Neye aale singa omulimo gw'abakabona aBaleevi gwatuukiiryeku ekigendererwa kya Kibbumba ekya kutuukirirya abantu, tiyanketaagire okusindika okabona ogondi afaananaku n'oMerikizedeki, omu kifo ky'oodi ow'omu lulyo lw'Alooni.\*

<sup>12</sup> Era, ng'obwakabona owebwacuukiremu ni busuuka bw'enkola mpyaka, kyabaire kisaani-ire n'amateeka agafuga entambulya yaabwo gona bagacuusemu.

<sup>13</sup> Nti iye oMusengwa waiswe, ogubatumulaku aanu, tiyazwire mu lulyo lwa Leevi wazira lundi

---

\* **7:11 7:11 Alooni**, niye eyabaire okabona akira obukulu asooka.

omwabbairere timuzwangakuumu muntu waire moiza okuweererya ng'okabona oku kyoto.

<sup>14</sup> Kintu kimanye kiti, yazwire mu lulyo lwa Yuda, onaabbi Musa olwatakobangaku ati mwirwo mwona mwalizwamu abakabona.

<sup>15</sup> Ebyo byeyongerera nakimo okutegeerekeka, owewasetukayo okabona ogondi afaananaku n'oMerikizedeki ng'oweyabbairere kabona.

<sup>16</sup> Oyo iye okumulondakwe okubba okabona tikwabbairere lwakubba nti atuukana n'ekiragiyo ekya kubba ow'omu lulyo lwa Leevi, wazira lwakubba nti ali n'amaani aga bwomi obutawaawo.

<sup>17</sup> Iye niiye ogubatumulaku bati:  
"Oli kabona ow'emirembe n'emirembe,  
okufaananaku n'oMerikizedeki  
ng'oweyabbairere kabona."

<sup>18</sup> Omu ngeri eyo, ekiragiyo kidi ekifuga okwingira obwakabona ekyasookere atyanu bakidibirye, olw'obunafu n'okutagasa byakyo.

<sup>19</sup> Ekyo kityo olw'okubba aMateeka, mpaawo muntu ogugeezyerye okusuuca atuukiriire, neenu nga batuteekeirewo osuubi akiraku, omutwezya okubitira okwigerera eeri oKibbumba.

<sup>20</sup> OKibbumba oweyabbairere alonda okabona oyo, yakoleireku n'ekirayiro. Neye ibo aBaleevi okubba abakabona, tikwabbairereku kirayiro naire.

<sup>21</sup> OYesu yenkani niiye oKibbumba oguyalayiriire ati:  
"OMusengwa alayiire,

era tiyalyejusa mwekyo:

'Oli kabona ow'emirembe n'emirembe.' "

<sup>22</sup> Olw'ekirayiro kya Kibbumba ekyo, oYesu asuuka niye ekikakasa kiti endagaano eyo, ekiraku obusa.

<sup>23</sup> Enjawulo egendi eri eti, abakabona badi ibo baabbanga bangi olw'ensonga nti baafanga, kale ng'omoiza tayezya kubbeerererawo emirembe n'emirembe.

<sup>24</sup> Neye engeri egikiri nti oYesu iye aliwo mwomi buli kiseera, obwakabonabwe bubbeererawo emirembe n'emirembe.

<sup>25</sup> N'olwekyo ayezya okulokolera nakimo abo abaaba eri oKibbumba nga babita mwiye, olw'okubba aliwo mwomi ekiseera kyonakyona okubawozeryanga omumaiso ga Kibbumba.

<sup>26</sup> OYesu niye ali n'ekikula kya kabona akira obukulu ogutwetaagira nakimo. Nti niye oMutukulye, atuukiriire era abulaku kyokumunenya. Niiye oKibbumba oguyayawire okuzwa mwabo abakola ebibbibbi era oguyaniinirye n'abitamu eigulu.

<sup>27</sup> Iye tiyeetaaga kuwaayo sadaaka buli lunaku, okusooka oku lw'ebibbibbi ebibye, kaisi tete n'oku lw'eby'abantu abasigaire, ng'abakabona abakulu badi abandi owebakolanga. Ekyo iye yakikolere nga ky'omulundi gumo lumala, oweye-eewaireyo iye onyere.

<sup>28</sup> Nti igo aMateeka ga Musa gabitya abantu okubba abakabona abakulu waire nga bali n'obunafu. Neye ikyo ekirayiro oKibbumba

ekiyakolere, oluzwanyuma eino olw'okuwa aMa-teeka, kibitya Mwanawe kiti niye okabona akira obukulu. Era oyo iye atuukiriire emirembe n'emirembe.

## 8

*Okabona akira obukulu ow'eNdagaano eMpyaka*

<sup>1</sup> Ekikulu omu bintu ebitukoba niikyo kinu; okabona akira obukulu ogutuli naye atyo wayagaagana, era atyaimbe eeyo omwigulu aamo n'oKibbumba onyere oBwezye omu kifo ky'ekitiisya eino.\*

<sup>2</sup> Aweererya ng'okabona akira obukulu omu kifo ekitukulye, era omu weema eya Kibbumba enanyerenyeere ey'okusinziramu, oMusengwa iye onyere egiyateekerewo, etali ooti giinu abantu egibakola.

<sup>3</sup> Buli kabona akira obukulu bamuteekawo kuwaayo birabo n'esadaaka eeri Kibbumba. Kale n'okabona waiswe omukulu kagira yena yabbaire n'okubbaaku n'ekyawaayo.

<sup>4</sup> Singa yabbaire ku kyalo, tiyankubbaire kabona kadi katyayi kati, olw'okubba waliwo abakabona abawaayo ehirabo ng'aMateeka ga Musa owegalagira.

<sup>5</sup> Neye ibo omulimo ogubakola gufaananaku-bufaanani, era kiiriirye eky'ebyo ebiri omwigulu. Kagira oMusa oweyabbaire ng'ayaba okukola eweema eya Kibbumba,

---

\* **8:1 8:1** Ekifo ky'ekitiisya eino, ooba, Oku lubba lw'engalo endiiro eya Kibbumba. **8:1 8:1** Zab 110:1

oKibbumba yamulagiire ati, “Byonabyona obikole ng’osengererya enkola egibakulagire ng’oli oku lusozi.”

<sup>6</sup> Neye atyanu oYesu omulimo ogubamuwaire, gukirira nakimo ogwa bakabona badi obukulu, olw’okubba n’endagaano empyaka iye egyab-bairemu ng’omutabagania aakati wa Kibbumba n’abantu, ekira eedi enkaire obusa. OKibbumba oweyabbaire nga akakasa endagaano empyaka yakolere ebisuubizo ebisa ebikira bidi ebizwa omu Mateeka ga Musa obusa.

<sup>7</sup> Singa endagaano esooka yabbaire ebu-laku ekyokuginenya, tiwankubbairero okwe-taaga eyokubiri.

<sup>8</sup> Neye oKibbumba atumula ng’anenya aban-tube ati:

“OMusengwa alangirira ati,  
ekiseera kyalituuka,

ni nkola endagaano empyaka n’abantu b’e  
Isirairi,  
era n’ekika kya Yuda.

<sup>9</sup> Tiyalibba ng’endagaano eginakolere n’abazeiza  
baabwe,

oku lunaku olunabakwaite oku ngalo  
okubatoola omu kyalo ky’e Misiri,  
olw’okubba tibeekalanguliire  
omu kukwata endagaano eyo.

Zena kagira ndekayo okubawulisisya.”

<sup>10</sup> “Era oMusengwa alangirira ati,  
eenu niiyo endagaano eginalikola  
n’aBaisirairi  
enaku egyo owegyalituuka.



Naliteeka aMateeka gange  
omu biseego byabwe.

Era naligawandiika  
omu myoyo gyabwe.

Nalibba Kibbumba waabwe,  
bona ni babba bantu bange.

<sup>11</sup> Tiwalibbaawo ayegesya omwinaye,  
ooba ayegesya omugandawe ati,

'Omanyeye oMusengwa,'

olw'okubba okuzwera nakimo oku muto-  
muto okutuuka oku mukulu,  
bonabona balimanya ng'oMusengwa  
waabwe.

<sup>12</sup> Ekyo wekyalibba olw'okubba nalibasoniya  
okubbenga kwabwe,  
n'ebibbibbi byabwe tinalibyebukirya  
tete."

<sup>13</sup> OKibbumba owaayeta endagaano eenu ati  
mpyaka, abba eedi esooka agisuucirye nkaire  
eweiremu amaani. Era ekintu owekikula ni  
kiwaamu amaani kibba kyatira n'okuzwawo.

## 9

### *EWeema eya Kibbumba ey'oku kyalo*

<sup>1</sup> Era endagaano esooka ey'aMateeka ga  
Musa yabbaire n'ebiragirowo ebyalaganga engeri  
y'okusinzamu oKibbumba, era n'eraga n'ekifo  
ekitukulye eky'omu kifo ky'okumusinziramu  
eky'oku kyalo.

<sup>2</sup> Ekifo ekyo kyabbaire weema eya Kibbumba  
aBaisirairi egibakomekere ng'erimu ebisenge  
bibiri. Omu kisenge kyayo e kyenza, ooba

ekisooka, mwabbairemu ekikondo oku bayanika eitaala. Era nga mulimu n'emenza, n'emigaati egibawonga eeri oKibbumba. Ekitundu ekyo nga bakyeta Kifo eKitukulye.

<sup>3</sup> E nyuma w'olutimbe olwokubiri, olwabbaire omunda omu Kifo eKitukulye, niiwo awabbaire ekisenge ekyokubiri ekibeeta eKifo eKitukulye eIno.

<sup>4</sup> Mwiyo mwabbairemu ekyoto eky'obubbaani, ekibakolere mu zaabbu. Era mwabbairemu esanduuku ey'endagaano, egibasiigireku ezaabbu oku mba gyonagyona. Omu sanduuku eyo, mwabbairemu ekibya eky'ezaabbu, omwabbaire obubbongokera bw'emere egibeeta emaanu. Era mwabbairemu n'omwigo gw'Alooni ogwalokere, n'ebipande ebibiri eby'amabbaale okubawandiikire ebiragiyo eikumi ebya Kibbumba.

<sup>5</sup> Oku ngulu kwayo kwabbaireku ebifaananyi by'abakeruubbi\* ab'ekitiisya. Ebiyaya byabwe nga bikingulya oku ngulu kw'ekisaanikiro ky'esanduuku oku baswankiranga omusaaye gw'ebyo ebibasadaakire. Ebiyaya ebyo byabiikanga oku kisaanikiro† iyo entebe ya Kibbumba onanyere okusaasira. Ebyo byonabyona titwezya kubisonzola atyanu ekimo ku kimo.

<sup>6</sup> Ebyo byonabyona nga biwoire okubicaana

---

**9:2 9:2** Kuz 26:1-30; 25:23-40    **9:3 9:3** Kuz 26:31-33    **9:4 9:4** Kuz 16:4-36    **9:4 9:4** Kuz 16:33; 25:10-16; 30:1-6; Kub 17:8-10; Ama 10:3-5    \* **9:5 9:5** *Bakeruubbi*. Ebibbumbe by'omwigulu ebibbaaku ebiyaya.    † **9:5 9:5** *Kisaanikiro*. Ky'esanduuku y'eNdagaano.    **9:5 9:5** Kuz 25:18-22

nakusani bityo, abakabona baingiranga bulijo omu kisenge ekisooka, ni batuukirirya omulimo gwabwe.

<sup>7</sup> Neye omu kisenge ekyokubiri, eyaingirangamu yabbaire kabona akira obukulu yenkani, ng'aingiramu omulundi gumo buli mwanka, era ng'ali n'okutwalayo omusaaye gw'esadaaka oguyaawangayo okululwe, n'oku lw'ebibbibbi by'abantu ebibakola omu kutamanya.

<sup>8</sup> Mwebyo byonabyona oMwoyo oMutukulye yabbaire alaga ati, enzira etuuka omu Kifo eK-itukulye eIno, yabbaire ekaali kumanyikana eeri abantu, ng'eweema eya Kibbumba eyasookere ekaali eriwo.

<sup>9</sup> Ekyo kyabbaire kifaananyi-bufaananyi ekiwa ekyokwega ekyamakulu omu biseera binu ebitulimu. Kiraga kiti, ebirabo n'esadaaka ebyo ebibaawangayo, tibyezyanga okutukulya oku-toolawo okuwulira omusango omu mwoyo gw'oyo abiwaayo.

<sup>10</sup> Byakomanga ku bintu by'oku ngulu, ebifa ku byokulya n'oku byokunywa n'oku bu-lombolombo obw'okwetukulya, era ebyabbaire eby'okubbaawo paka oku kiseera eky'okwirya buli kintu obuyaaka.

### *Omusaaye gwa Kurisito*

<sup>11</sup> Neye oKurisito yaizire nga niye ok-abona akira obukulu ow'ebisa ebyaba okwiza, n'angiire omu weema eya Kibbumba ekira

obukulu n'okutuukirira, eteri y'abantu egibakolere. Ekikoba kiti, iyo tiya ku kyalo kunu neye y'omwigulu.

<sup>12</sup> Iye tiyaingiireyo na musaaye gwa mbuli ooba gwa nyana wa nte. Wazira yaingiireyo na musaayegwe ogunanyerenyeere, n'aingirira nakimo omu Kifo eKitukulye eIno omulundi gumo lumala, ng'amalire okutusunira okutununula okutawaawo.

<sup>13</sup> Atyanu, omusaaye gw'embuli n'ogw'ente enumi, n'eikoke lya mpaki egiboocerye, ebibamwaga kwabo abatatakula, bibatakulya, omu Mateeka ga Musa, ni babba batukula ku ngulu mu mubiri neye timu myoyo.

<sup>14</sup> Neye oKurisito abulaku ekyokumunenya, yeewaureyo n'afa ng'esadaaka eeri oKibbumba omu maani ga Mwoyo atawaawo. Aale atyanu omusaayegwe tigwalikirawo ino okunaabya emyoyo gyaiswe nga gutoolawo okuwulira omusango olw'ebikole ebibbibbi, ni tuweererya oKibbumba onanyere obwomi?

<sup>15</sup> N'olwekyo oKurisito niye omutabagania omu ndagaano empyaka, olw'okubba abo oKibbumba abeyalondere n'abasuubiza ebintu ebisa ebitawaawo, abayezyesya okubisuna. Ekyo kyezyeka, olw'okubba yafiire n'anunula abantu omu bibbibbi byabwe ebibakolere nga bakaali bali ansi w'eifuge ly'endagaano esooka.

<sup>16</sup> Ng'ekyokuboneraku, omuntu owaakola eki-raamo kikakata ng'eyakikolere amalire kufa.

17 Ekiraamo tikikola ng'eyalaamiirye akaali mwomi, wazira amala kufa, kaisi ni kikola.

18 N'endagaano esooka kagira bagikakasire na musaaye.

19 OMusa oweyamalire okulanga eeri abantu ebiragiyo bya Kibbumba byonabyona ebiri omu Mateeka, n'akwata omusaaye gw'ente n'ogw'embuli, n'atabulyamu amaizi. Kaisi n'asiba ebyoya bya ntaama ebitukuliki oku kasaale akebeeta "Yisopu," n'aswankira omusaaye ogwo oku kitabo ky'aMateeka n'oku bantu bonabona.

20 Yaswankiranga nga waakoba ati, "Gunu niigwo omusaaye ogukakasa endagaano oKibbumba egyabalagiire okutuukirirya."

21 Era omu ngeri enanyere eyo, oMusa n'aswankira omusaaye ogwo oku weema eya Kibbumba n'oku bintu byonabyona ebibakolesya omu kusinza.

22 Era omu Mateeka, kumpi buli kintu bakitukulya na musaaye, era anambula kusuka omusaaye, tiwabbaawo okusoniya omuntu ebibibbi.

### *OKurisito sadaaka etoolawo ekibbikibbi*

23 Kale abakabona, kyabbaire kibeetaagisya okutukulya ebifaananyi eby'ebintu ebiri omwigulu nga bawaayo sadaaka egyo. Neye ebintu ebiri omwigulu ebinanyerenyeere, byetaaga okubitukulya n'esadaaka ekira egyo obusa.

<sup>24</sup> Era oKurisito tiyaingiire omu kifo ekitukulye nga bantu niibo abakikolere, ekifaanana-obufaanani na kidi ekinanyerenyeere. Wazira yaingiire omwigulu awananyerenyeere, era nga gyali n'atyanu omumaiso ga Kibbumba ng'atukiikirira.

<sup>25</sup> Era oKurisito tiyaingiire omwigulu kwewaayo mirundi mingi, ng'okabona akira obukulu owaingira buli mwanka omu Kifo eKitukulye okuwaayo omusaaye gw'ebisolo.

<sup>26</sup> Singa kyabbaire kityo, awo oKurisito yankubbaire ali n'okugada emirundi mingi okuzwera nakimo ekyalo kasookeede bakibbumba. Neye iye yabonekere lumu, mu biseera binu eby'enkomerero, kaisi atoolewo ekibbikibbi oku lw'abantu bonabona, nga yeewaayo onyere ng'esadaaka.

<sup>27</sup> Era nga buli muntu oKibbumba oweya-mutegekeire okufa lumu, era oluzwanyuma lw'okufa, ni bamusalira omusango,

<sup>28</sup> era n'oKurisito atyo, bamuwaireyo omulundi gumo ng'esadaaka okwetiika ebibbibbi by'abangi. Yaliiza omulundi ogwokubiri, neye nga taizire kwiramu kwetiika kibbikibbi, wazira okulokola abo abamukuumirira.

## 10

### *OKurisito niye esadaaka emala kusani*

<sup>1</sup> Amateeka g'ekiyudaaya, kiiriirye-bwiriirye ky'ebintu ebisa ebyabbaire biiza oKibbumba

ebiyasuubizire, neye nga tibyabbaire niibyo ebinyerenyeere. N'olwekyo igo tigezuya, nga gabita omu sadaaka egyo, egibairairamu buli mwanka, ni gatukulirya nakimo abo abagiwaayo nga basinza.

<sup>2</sup> Singa gabbaire geezuya okubatukulirya nakimo, esadaaka gyankubbaire tigikaali gyetaagisya okuwaayo, olw'okubba abagiwaayo bankubbaire babatukulirya nakimo mulundi gumo lumala, era ng'atyanu tibawulira musango omu mwoyo olw'ekibbikibbi.

<sup>3</sup> Neye esadaaka egyo, olw'okubba bagiwaayo buli mwanka, kibaleetera kwebukirya bibbibibbi ebibakolere enyuma buli owebawaayo esadaaka,

<sup>4</sup> olw'okubba omusaaye gw'ente enumi n'ogw'embuli tigwezuya okutoolawo ebibbibibbi.

<sup>5</sup> OKurisito ng'aiza omu kyalo, niikyo ekya-girire n'akoba oKibbumba ati:

"Esadaaka n'ebyo ebibawaayo, tiniibyo omwoyogwo ebigwegombere, neye wantegekeire nze omubiri.

<sup>6</sup> Nabuli sadaaka egibawaayo nga bagyoca yonayona,

n'egyo egibawaayo olw'ebibbibibbi, tiwabisiimire.

<sup>7</sup> Kagira zena nkoba nti, Ngonu ndi aanu.

Njizire okukola ebyotaka, Musengwa wange Kibbumba, ng'eKiwandiike owekintumulaku."

<sup>8</sup> Era okusookesya yakobere ati:

"Esadaaka n'ebyo ebibawaayo, n'ebyo ebibawonga nga babyoca byonayona,

n'ebyo ebibawaayo olw'ebibbibbi,  
tiniibyo omwoyogwo ebigwatakire era ti-  
wabisiimire.”

Ekyo yakitumwire, newankubbaire ng'ebyo by-  
onabyona babiwangayo ng'aMateeka owegala-  
gira.

<sup>9</sup> Awo n'airaku n'akoba ati, “Ngonu ndi aanu.  
Njizire okukola ebyotaka.” N'olwekyo atoolawo  
ekika ekisooka eky'esadaaka gy'ebisolo, kaisi  
olwo atekewo ekyokubiri.\*

<sup>10</sup> Era batusuucirye abantu abatukulye  
olw'okubba oYesu Kurisito yakolere ekyo  
oKibbumba ekyataka, oweyawareyo  
omubirigwe ng'esadaaka omulundi gumo  
lumala.

<sup>11</sup> Buli moiza oku bakabona b'ediini  
y'eKiyudaaya, ayemerera buli lunaku, n'awaayo  
emirundi mingi esadaaka eginyere egyo,  
egiteezya kutoolawo ebibbibbi.

<sup>12</sup> Neye oKurisito yeewaireyo ng'esadaaka  
lumo lwonkani, neye ng'emala-bumali  
okusasulira ebibbibbi ebiseera byonabyona,  
kaisi n'atyama n'oKibbumba omu kifo  
ky'ekitiisya eino.†

<sup>13</sup> Eeyo gyakuumiire paka oKibbumba oweyali-  
maliramu nakimo abalabebe amaani n'abasuuca  
ekintu ky'okwemaku bigerebye.

<sup>14</sup> Olw'okuwaayo esadaaka eyo emoiza,  
abo abaatukulya yabasuniire obutuukirirye

---

\* **10:9 10:9** Ooba, *N'olwekyo atoolawo endagaano esooka, kaisi atekewo eyokubiri.* **10:11 10:11** Kuz 29:38 † **10:12 10:12** *Ekifo eky'ekitiisya eino, ooba, Oku lubbaalwe olw'engalo endiiro.* **10:13 10:13** Zab 110:1



obw'ebiseera byonabyona.

<sup>15</sup> Era n'omwoyo oMutukulye, ekyo akikakasa egituli. Asookesya n'akoba ati:

<sup>16</sup> "OMusengwa akoba ati, eenu niyo endagaano eginalikola nabo, enaku egyo owegyalituuka.

Naliteeka amateeka gange omu myoyo gyabwe, era nalgawandiika omu biseego byabwe."

Tete n'akoba ati:

<sup>17</sup> "N'ebibbibbi byabwe n'obutengu bwabwe tinalibyebukirya tete."

<sup>18</sup> Era oKibbumba owaamala okusoniya abantu, wabba tiwakaali weetaagisya okuwaayo esadaaka olw'ebibbibbi.

*Twigerere eri oKibbumba*

<sup>19</sup> Kale boluganda, atyanu twezya okwingira omu Kifo eKitukulye eIno nga tubula kutya, nga twesiga tuti oYesu yasukire omusaayegwe n'afa oku lw'ebibbibbi byaiswe.

<sup>20</sup> Kale yatwiguliirewo enzira empyaka, era enjomi omu tubita ni twaba buteereeri omu Kifo eKitukulye eIno eky'omwigulu nga mpaawo ekitugaana ng'olutimbe olwabbairi omu weema. Era enzira eyo niigwo omubirigwe oguyawaireyo.

<sup>21</sup> Kale ng'owetuli n'okabona akira obukulu atyo, era afuga enyumba ya Kibbumba eri omwigulu,

<sup>22</sup> twigerere eri oKibbumba n'omwoyo ogubulamu bubbeyi, era ogwizwire okwikirirya. Tukikole nga tuli n'emyoyo emiteere,

nga gibulamu okuwulira omusango, era n'emibiri gyaiswe nga gibulamu bufuduuki bw'ekibbikibbi nga giri ooti baginaabirye n'amaizi agatukula.

<sup>23</sup> Tukulangukire oku suubi ogutukobera abantu era nga tituyuugayuuga, olw'okubba oKibbumba eyasuubizire, iye mwesigwa.

<sup>24</sup> Tufengeyo ino okunoonia engeri egy'okukumanganamu omusyo oku nsonga gy'okutaka n'okukola ebikole ebisa.

<sup>25</sup> Tuleke okugayaaliriranga okwaba omu nkumbaana gy'abaikirirya omu Kurisito, ng'abamo owebakola. Neye buli moiza airyengemu omwinaye amaani, eino eino nga nywena owemubona muti oLunaku lwa Musengwa okwira lwatira okutuuka.

<sup>26</sup> Singa owetwaba nga tukola ekibbikibbi omukweyendera, aate ng'amazima g'obukwenda bwa Kurisito tumalire okugategeera, wabba tiwakaali waliwo sadaaka gendi egibawaayo olw'ebibbibbi bwaiswe.

<sup>27</sup> Ekibba kisigaliire, niikwo okubba omu kutya, nga tukuumiriire kutusalira musango, era n'obukambwe bw'omusyo ogwaba okwoca abalabe ba Kibbumba.

<sup>28</sup> Omuntu eyajeemeire aMateeka ga Musa, bamwitanga-bwiti anambula kumusaasira, ka-sita wabbangawo abajulizi babiri ooba basatu abamulumiriza.

<sup>29</sup> N'olwekyo n'omuntu atalyanguka oMwana wa Kibbumba, atyo omusaaye ogw'endaagano

ogwamutukwirye, n'alitwala ng'ogutali mutukulye, era n'azumirira oMwoyo atulaga ekisa, museega muti tiyalisaanira ekibonerezo ekikirawo obukambwe?

<sup>30</sup> Nti tumaite ng'oKibbumba niiye eyakobere ati:

"Okunyaana kwange,  
ninze nalibasasula."

Era eKiwandike ekindi kikoba kiti: "OMusen-gwa yalisalira abantu omusango."

<sup>31</sup> Ky'entiisya ino oKibbumba onanyere obwomi okukusalira omusango!

<sup>32</sup> Mwebukirye ebiseera ebyabitire, ebimwasuniiremu ekitangaala kya Mawuliro aMasa aga Yesu, ni muguminkiriza okubagadya okw'amaani.

<sup>33</sup> Emirundi egimo babazumire era ni babayi-igania, emirundi egindi ni mubbeera abo abebakolere batyo.

<sup>34</sup> Mwalumirwanga ino abasibe, era mwaguminkirizanga n'eisangaalo abantu owebabanyagireku ebyanywe, olw'okubba mwamaite muti muli n'ebintu ebikirawo obusa ebiri omwigulu ebitawaawo.

<sup>35</sup> Kale timumumanga obugumu bwanywe omu bintu bya Kibbumba, olw'okubba mwalisuna empeera nene.

<sup>36</sup> Kyetaagisya muguminkirizenge, kaisi olwo mukolenge ebyo oKibbumba ebyataka, era kaisi abawe ekiyasuubizire.

<sup>37</sup> Wasigaire akaseera kampi ino,  
"Oyo ow'okwiza aize, era ala tiyalirwa."

<sup>38</sup> Neye omutuukiriry e wange yaabbanga mwomi lwa kwikirirya.

Neye singa aira e nyuma, tinalimusaasira.”

<sup>39</sup> Neye iswe tituli mwabo abaira e nyuma, ni bajigirika, wazira tuli mu baabo abaikirirya, ni babalokola.

## 11

### *Okwikirirya okubikola*

<sup>1</sup> Okwikirirya niikwo okubba n’okwekakasa tuti ebyo ebitusuubira okubbaawo dala byabbaawo, era n’okubona ebintu ebitaboneka ooti aamo biriwo.

<sup>2</sup> Okwikirirya, niikwo okwaleeteire oKibbumba okusiima abantu ab’eira abamuweeryanga.

<sup>3</sup> Okwikirirya, niikwo okutwezyesya okutegeera tuti ebintu byonabyona, ebiri angulu n’ansi, babikolere lw’ekiragiyo kya Kibbumba, era tuti ebiboneka babikolere kuzwa mu bitaboneka.

<sup>4</sup> Okwikirirya, niikwo okwaleeteire Abberi omutaane w’Adamu okuwaayo eeri oKibbumba esadaaka ensa okukiraku eya mugandawe omukulu oKaini. OKibbumba yasiimire ebirabobye era n’akakasa ati Abberi atuukiriire. Era olw’okwikiriryakwe, newankubbaire nga atyanu mufu, neye ebiyakolere bikaali bitumula.

<sup>5</sup> Okwikirirya, niikwo okwaleeteire Enoka okumutwala okuzwa oku kyalo kunu, n’ayaba egiri oKibbumba nga tasookere kufa. Era

oluzwanyuma, mpaawo eyamuboineku olw'okubba oKibbumba yamutwaire. Ekyo kyabbaire kityo olw'okubba oweyabbaire nga bakaali kumutwala, oKibbumba yakakasire ati Enoka amusangaalisirye.

<sup>6</sup> Neye mpaawo muntu ayezya okusangaalya oKibbumba anambula kwikirirya, olw'okubba buli aiza egiri oKibbumba, ali n'okwikirirya ati oKibbumba aliwo, era ati awa empeera abo abamunoonia n'eiganyi.

<sup>7</sup> ONuwa, oKibbumba oweyamulabwire oku byabbaire bikaali kuboneka, okwikiriryakwe kwamwezyesyerye okugondera oKibbumba, n'ayombeka ogwato gunene okulamya ab'omu kisitokye. Atyo oNuwa yalagire ati abantu abasigairewo, abanandi baikirirya ebiyakobere, omusango gubasinga, era n'asuna obutuukirirye obubbaawo lwa kwikirirya.

<sup>8</sup> Okwikirirya, niikwo okwaleeteire oIbbulaimu okugondera oKibbumba, oweyamwetere azwe e waabwe ayabe omu kyalo oKibbumba ekiyabbaire ayaba okumuwa. Atyo n'ayaba nga tamaiteku egyalungama.

<sup>9</sup> Era okwikirirya, niikwo okwamuleeteire okubba omu kyalo ekyo ekibamusuubizire omu ngeri ooti aamo mugeni, ng'agona mu weema. Era n'omutaanewe oIsaka n'omwizukuluwe oY-aakobbo, bona oKibbumba abeyasuubizire ekintu ekimo ekinyere ekyo bona bagonanga mu weema.

<sup>10</sup> Mwekyo oIbbulaimu yabbaire alaga ati iye anoonia kibuga oKibbumba onyere ekiyagerere era n'akyombeka, ekiri n'emisingi emikalanguki.

<sup>11</sup> Okwikirirya, niikwo okwezyesyerye oIbbulaimu eyabbaire akairiire awoireyo, okubyala omwana omu Saala eyabbaire omugumba. OIbbulaimu yaikiriirye ati oKibbumba eyabbaire asuubizire okumuwa omwana, iye mwesigwa era yatuukirirya ekibonokye.

<sup>12</sup> N'olwekyo omuntu oyo omoiza oIbbulaimu, newankubbaire nga yabbaire muntu akairiire eino nga takaali ayezya okubyala, yazwiremu abaizukulu bangi ino ooti nkota, era ooti nsenye egitabalika egiri oku mbale mbale kw'enyanza.

<sup>13</sup> Abantu abo bonabona bafiire nga baikirirya, neye nga bakaali kusuna ebyo oKibbumba ebiyasuubizire, wazira nga babirengerera yala omu myoyo gyabwe, ni babisangaalira. Era babbaire bakakasa bati ibo bageni era basenze oku kyalo kunu.

<sup>14</sup> Abantu abatumula batyo, balaga bati waliwo awantu awandi egibasubira okwajirya obutyami bwabwe.

<sup>15</sup> Era singa emyoyo gyabwe gyabbaire gye-gomba ino ekyalo ekibazwiremu, bankansunire eibbanga ly'okweirirayo.

<sup>16</sup> Neye atyanu beegomba obutyami obukiriraku nakimo obusa, obwo nga niibwo obw'omwigulu. OKibbumba kagira ensoni tigimukwata ibo okumweta Kibbumba

waabwe, olw'okubba yabategekeire ekibuga eky'okutyamamu.

<sup>17</sup> OIbbulaimu, oKibbumba oguyabbaire asuubizire okusuna abaizukulu abangi, owebamugezeserye, okwikiriryakwe kwamwezyesyerye okuwaayo oIsaka omwanawe omoiza yenkani, abbe esadaaka.

<sup>18</sup> OKibbumba yabbaire amukobere ati, "OmwIsaka mu walisunira abaizukulu."

<sup>19</sup> OIbbulaimu yeegire ati oKibbumba ayezya okuzuukiza. N'oKibbumba niikyo ekyagirire n'amwirirya oIsaka, eyabbaire nankinga azwire mu bafu.

<sup>20</sup> Okwikirirya, niikwo okwezyesyerye oIsaka okusabira abataanebe, oYaakobbo n'Esawu, enkabi mwebyo ebyabbaire byaba okwiza.

<sup>21</sup> OYaakobbo oweyabbaire nga yatira okufa, okwikirirya, niikwo okwamwezyesyerye okusabira abaana b'omutaanewe oYusufu enkabi moiza moiza, era oluzwanyuma n'akotama oku mwigogwe, n'asinza oKibbumba.

<sup>22</sup> OYusufu oweyabbaire nga yatira okufa, okwikirirya, niikwo okwamwezyesyerye okutumula ati, ekiseera kyalituuka aBaisirairi ni bazwa omu bugalama e Misiri ni bakanga omu kyalo ky'e waabwe. Era n'alagira ati, balinginga amagumbage bamukanja e waabwe.

<sup>23</sup> OMusa owebamubyaire, okwikirirya, niikwo okwaleeteire ababyairebe okumubisira emyeri misatu miramba. Baboine nga mwana

musa ino, nandi ni batya okujeemera ekiragiyo kya Falaawo okabaka wa Misiri, ekyokuwaayo abaana ebiweigera babaite.

<sup>24</sup> OMusa oweyakulire, okwikirirya, niikwo okwamwezyesyerye okugaana okumweta omwana wa mwala wa Falaawo.

<sup>25</sup> Yasiimire okudambira aamo n'aBaisirairi, abantu ba Kibbumba, okukiraku okubba omwisangaalo ery'ekibbikibbi eriwaawo amangu.

<sup>26</sup> Yaboine ati okumugadya olwa Kurisito ogubasukireku amafuta, kukirira nakimo obusuni bw'e Misiri, olw'okubba yamaite empeera egibalimuwa.

<sup>27</sup> Okwikirirya, niikwo okwezyesyerye oMusa okuzwa e Misiri, nandi n'atya obulwa bwa Falaawo obwazwa mwekyo, neye yakalaire-bukalali n'ayaba, ng'ateekere omwoyogwe gwonagwona ku biibyo oKibbumba oNantaboneka ebiyamukobere.

<sup>28</sup> Okwikirirya, niikwo okwamwezyesyerye okuteekawo oMukolo ogw'oKutambukirya, n'aswankira omusaaye e ngulu oku myango gy'enjigi, kaisi aBaisirairi balame omalaika oyo ajigirica, oKibbumba oguyatumire okwita abaana ababere omu kyalo ky'e Misiri.

<sup>29</sup> Okwikirirya, niikwo okwezyesyerye aBaisirairi okutambulira omu Nyanza eNtukuliki, ooti aamo batambulira kwitakali. Neye aBamisiri ibo owebagezeryeku, amaizi ni gabamira.



30 Okwikirirya kw'aBaisirairi, niikwo okwaleeteire ebitempe by'olukita lw'ekibuga oYeriko, okugwa nga aBaisirairi bamalire enaku musanvu nga bakumba okweruguulirirya ebitempe ebyo.

31 Olw'okwikirirya, omalaaya oLakabbu yayanirizire aBaisirairi abaizire omu kibuga e Yeriko okukeeta. Kale oluzwanyuma, aBaisirairi owebaizire okuwamba ekyalo ekyo, tibaitire oLakabbu n'abantube nga baita abantu abajeemu.

32 Kale oku byokuboneraku ebyo, nnyongereryeku niki-so tete? N'obwire bwampwaku singa ntumula n'oku Gidyoni, n'oku Bbalaki, n'oku Samusooni, n'oku Yefusa, n'oku kabaka oDawudi, n'oku Samwiri, n'oku banaabbi.

33 Olw'okwikirirya, abantu abo balumbire ni bawangula obwakabaka obw'amawanga agandi, ni bakola ebyobutuukirirye, era ni basuna ebyo oKibbumba ebiyasuubizire. Olw'okwikirirya kwabwe owebabamumire egiri empologoma gyakaire okubalya,

34 ni babamuma omu omusyo ogw'amaani neye nandi gubooca, ni balama n'okubaita n'empiima. Era olw'okwikirirya, abo ababbaire abanafu basuukire bamaani. Basuukire bazira omu ntalo, ni babbinga amaje g'amawanga agandi.

---

**11:30 11:30** Yos 6:12-21      **11:31 11:31** Yos 2:1-21; 6:22-25  
**11:32 11:32** Bal 6:11-8:32; 4:6-5:31; 13:2-16:31; 11:1-12:7; 1Sa;  
16:1-23; 1Ba 2:11; 1Sa 1:1-25:1      **11:33 11:33** Dan 6:1-27      **11:34**  
**11:34** Dan 3:1-30

<sup>35</sup> Era olw'okwikirirya waliwo abakali ababaire bafisiryeye abaana baabwe neye abaana abo ni bazuukira.

Abantu abandi babawambire ni babagadya bati owebalekawo okwikirirya oKibbumba babateera, neye ni bagaana okulekawo okwikirirya. Basalirewo bati kasinga bafa kaisi ni bazuukira okusuna obwomi obukiraku obusa.

<sup>36</sup> N'abantu abandi babasekereire ni babakubba emiigo, era abandi ni babasibira omu mabbuusu.

<sup>37</sup> Abamo babakubbire mabbaale, n'abandi babasaliremu n'emisumeeno, era n'abandi babaitire n'empima. Abandi babakedyakedyanga nga bazwaire ebyanzo eby'entaama n'eby'embuli, olw'obudoobi era ng'abantu babayiigaania, era ni bababitya bundi,

<sup>38</sup> ekyalo kinu ekiizwire obubbibubbi nga tikibasaanira ibo abatuukiriire okubbaamu. Era ni balebalebana omu bitera n'omu nsozi, nga bagona mu mpuku n'omu biina.

<sup>39</sup> Abo bonabona oKibbumba yabasiimire olw'okwikirirya kwabwe neye kwibo kubulaku eyasunire ebyo ebibasubizire.

<sup>40</sup> OKibbumba yatutegekeire enkola y'obutuukirirye ekira obusa, ibo kaisi baleke okusuna okubasuuca abatuukiriire iswe nga tubulawo.

# 12

## *OKibbumba agolola abaanabe*

<sup>1</sup> Kale, tuli n'abantu bangi ino batyo abalaga nga beesigire oKibbumba, era atyanu nga bali ooti bantu ababba beeruguuliriirye ekisaawe nga batulingiriire iswe abali omu muzenyo. N'olwekyo tweyambulye buli kintu ekiri omu bwomi bwaiswe ekitukaisya okuweererya oKibbumba, era n'ekibbikibbi ekitira okwiza ni kitugwisya. Tukole ebintu oKibbumba ebyataka tukole, n'eiganyi lingi ng'omwiruki omu koolo ow'embiro owaabba. Era tuweererya oKibbumba nga tuli baguminkiriza,

<sup>2</sup> nga tumaliire ebiseego byaiswe byonabyona ku Yesu yenkani. Okwikirirya kwaiswe kwemereirewo ku niye, okuzwera nakimo oku ntadiika paka ku nkomerero yaakwo. OYesu oyo, olw'eisangaalo eriyamaite ati yasuna ng'amalire okufa, yagumiire okufeera oku musalabba, nandi n'atya okuswala. Atyanu atyaime aamo n'oKibbumba omu kifo eky'ekitiisya eino.\*

<sup>3</sup> Mugerageranienge oYesu okwakanisya abantu abakola ebibbibbi okubamwakanisiryemu, na inywe okumubitamu, kaisi olwo ni mutademba n'okuwaamu amaani.

<sup>4</sup> Omu kulwanisya ekibbikibbi, inywe mukaali kulwana okutuuka oku kusuka omusaaye gwanywe.

---

\* **12:2 12:2** *Omu kifo eky'ekitiisya eino. Ooba, Oku lubbaalwe olw'engalo endiuro.*

5 Muli ooti mwerabiire ebibono oKibbumba ebyatumula ng'abairyamu amaani ng'abaanabe? Akoba ati:

“Mwana wange, otwalanga ng'ekyomuzeenyo ng'oMusengwa akugoloire.

Era tiwaawangamu amaani owakukobaku,  
6 olw'okubba oMusengwa agolola ogwataka,  
era abonereza buli moiza ogwatwala ng'omwanawe.”

7 Mugumirenge okubagolola, olw'okubba oKibbumba abagolola ng'abaanabe. Aale mwanaki oiteeye ogwatagolola?

8 Neye oKibbumba owaatabagolola, ng'abaanabe bonabona owabagolola, mubba baana b'e nza, neye tibaanabe ab'omunda abananyerenyeere.

9 N'ekindi, twabbaire n'abaitewaiswe omu mubiri, abatugololanga, era ni tubawanga ekitiisya olw'okukola ekyo. Kaisi atyanu titwasingisyewo ino okugondera oItewaiswe omu mwoyo, ni tusigalya obwomi obutawaawo?

10 Abaitewaiswe abo batugololanga okumala ekiseera kimpi kiti olw'ebyo ebibabonanga bati bituuce okukola. Neye iye oKibbumba atunenya lwa kutugasa niiswe, ng'ataka tugabane oku butukulyebwe.

11 OKibbumba owaabba atugolola, omu kiseera ekyo, okutugolola kufaanana ng'okutaleeta isangaalo, wazira bulumi. Neye oluzwanyuma, abo abeega ekibali kubeegesya okubita omu kubagolola okwo, basuna eidembe linene n'obutuukiriryte omu bwomi bwabwe.

<sup>12</sup> Kale, nga muweererya oKibbumba, mwire buyaaka omu bwomi bwanywe obw'omu mwoyo, era muweemu okutya.

<sup>13</sup> Mutambulirenge omu bwomi obw'okwikirirya oYesu nga timucuukacuuka, era abbaire n'obunafu obw'engeri yonayona tiyaagwa-bugwi, neye aire obuyaaka omu bwomi obw'omwoyo.

*Mwefudengeku okubba abantu abatukulye*

<sup>14</sup> Mwefudengeku okubba omwidembe n'abantu bonabona, era mwefudengeku okubba abantu abatukulye, olw'okubba mpaawo atali omutukulye eyalibona oMusengwa.

<sup>15</sup> Mwekuume, kaisi tiwaabbaawo omuntu afirwa omugabogwe ogw'ekisa kya Kibbumba ekiyatulagire ogw'okutulokola. Mwekuume, kaisi tiwaabbaawo kibbikibbi ekisetuka mwinywe, ni kibatabulatabula, era ni kyonoona abangi.

<sup>16</sup> Era mwekuume, tiwaabbaawo mulendi, ooba alulunkanira eby'ekyalo ng'Esawu, olw'okulya okwa lumu.

<sup>17</sup> Mumaite muti oluzwanyuma, oweyatakire okusuna omugabo gw'enkabi oiteeye oguyabbaire amusabiire, neye tibagimuwaire. Esawu yabbaire abula engeri ya kusansula ekiyabbaire akolere, newankubbaire nga yagezeryeku ino ng'ali mu maliga.

*Ensozi oSinaayi n'oSayuuni*

<sup>18</sup> Omu kwiza eeri oKibbumba, inywe timwizire awali olusozi oSinaayi olumwezya okukwataku, era olwaka omusyo. Era timwizire, ng'owekyabbaire oku Baisirairi. Mwizire giri ndikiirya ekwaite zigizigi, na gumpunga,

<sup>19</sup> na kwasyamika kw'ekondeere, n'eigono ly'ebibono, eryaleeteire abaliwuliire okwegairira baleke okweyongera okuliwulira.

<sup>20</sup> Tibayezyerye kugumira ekiragiro ekibabawaire, ekikoba kiti, "N'owekibba kisolo ni kyeguunya oku Lusozi, bali n'okukikubba amabbaale kife!"

<sup>21</sup> Mazima ebibaboine byabbaire by'entiisya ino, oMusa n'atuuka n'okukoba ati, "Ndi kutya ino era ntukuta!"

<sup>22</sup> Neye inywe okubitira omu kwikirirya mwizire ku Lusozi oSayuuni, era mu kibuga kya Kibbumba onanyere obwomi, era mwizire mu Yerusaalemi eky'omwigulu, abamalaika enkumi n'enkumi egibakumbaaniire omwisangaalo.

<sup>23</sup> Mwizire mu lukumbaana lw'abaikirirya olunene olw'abo, abali n'omugabo ooti baana ababere, abebawandiikire omwigulu. Mwizire giri Kibbumba omulamuzi wa bonabona, n'eeri emyoyo gy'abantu abatuukiriire, oKibbumba abaasuucirye abatukulye.

<sup>24</sup> Mwizire giri Yesu oMutabaganja omu ndagaano empyaka. Mwizire giri musaaye gw'okuswankira, ogutumula ebisa okukiraku ogw'Abberi omwana w'Adamu.

<sup>25</sup> Mwekuume, timwagaana okuteekayo omwoyo okuwulisisya oKibbumba ebyabakoba. ABaisirairi eira bagaine okuwulisisya oMusa oweyabalabwire ng'ali oku kyalo, era oKibbumba tiyalekere okubabonereza. N'olwekyo iswe owetugaana okuwulisisya iye onyere atu-labula ng'ali omwigulu, mpaawo wetwaliramira okutubonereza.

<sup>26</sup> Ku ludi oweyatumuliire oku Lusozi oSinaayi eigonolye lyatengeeterye ekyalo, neye atyanu yasuubizire ati, "Njiza kwiramu okutengeetya ekyalo, era ku lunu tikyalo kyonkani, neye n'omwigulu."

<sup>27</sup> Okukoba ati, "Njiza kwiramu," kitegeeza kiti ebibbumba ebibatengeetya balibitoolawo, olwo ebyo ebitezya kutengeeta kaisi awo bisigalewo.

<sup>28</sup> Kale ng'owetwaingiire omu bwakabaka obubatezya kutengeetya, twebalyenge oKibbumba, era tumusinzenge ng'oweyasiimire, nga tumuwa ekitiisya era nga tumutya,

<sup>29</sup> olw'okubba oKibbumba waiswe, iye musyo ogwoca ni gujigirica!

## 13

### *Obuweererya oKibbumba obwasiima*

<sup>1</sup> Mwongere okutakangananga ng'aboluganda omu Kurisito.

<sup>2</sup> Timwerabiranga okusangaalira abageni, olw'okubba omu kukola ekyo, eeriyo

abasangaaliire abamalaika nga tibakimaite bati niibo.

<sup>3</sup> Mwebukiryenge okubbeera abali omu mab-buusu olw'okubba baikirirya ba Yesu, nga muli ng'abebasibiire aamo nabo. Era mwebukiryenge abo abebagadya olw'okubba abaikirirya ba Yesu, olw'okubba nywena muli oku kyalo kunu, era ekinyere ekyo kyezya okubatuukaku.

<sup>4</sup> Obufumbo abantu bonabona babu-teekengemu ekitiisya, era babukuumenge nga butukulye, olw'okubba abalendi, oKibbumba yalibasingisya omusango.

<sup>5</sup> Mulekenge okubba abalulunkanira empiiya, era mukitwalenge muti ebintu ebimuli nabyo bimala, olw'okubba oKibbumba yakobere ati:

“Tinalyaba okubazwaku,  
era tinalibalekawo kadi katyayi kati.”

<sup>6</sup> Niikyo ekigira ni tutumula n'obugumu tuti,  
“OMusengwa niye omubbeeri wange,  
tinaatyenge.

Omuntu ayezya kunkola niki?”

<sup>7</sup> Museenge oku beekubbemberi baanywe, abo ababakobeire ekibono kya Kibbumba. Mwetegereze ebyo ebibabitiremu omu bwomi bwabwe, era musengererye okwikirirya kwabwe omu Yesu Kurisito.

<sup>8</sup> OYesu Kurisito tacuuka, ng'oweyabbaire eizo, bwali n'atyanu, era atyo weyalibba emirembe n'emirembe.

*Mulondewo Yesu ooba sadaaka gy'omu Ma-teeka*



9 Timwaganyanga ni babagotesyagotesya n'enjegesya egitali gimo endiibi, egitaabirana n'amazima ga Kibbumba. Kisa obugumu bwa kwikirirya, omu myoyo gyaiswe, ni bwemerera ku kumanya kisa oKibbumba ekiyatulagire, neye tikubulombolombo bwa byakulya, obutagasa n'okugasa abo ababusengererya.

10 Abaikirirya ba Yesu tuli n'ekyoto, ibo abaweererya omu nkola enkaire ey'ekiyudaaya ekolera oku Mateeka ga Musa, ekibabulaku obweze okuliiraku.

11 Okabona akira obukulu atwala omusaaye gw'ebisolo omu Kifo eKitukulye eIno, n'aguwaayo olw'ebibbibbi, neye ibyo ebinanyere ni babyocerya nza w'ekigo abantu e kibagonangamu.

12 Era n'oYesu yagadiire e nza w'olukita lw'ekibuga, kaisi atukulye obwomi bw'abantu n'omusaayegwe.

13 Kale tuzwe omu manzira agandi gonagona ag'okuweerererya oKibbumba, twabe eeri oYesu e nza w'ekigo, era twikirirye okubita omu kuswalira eeyo okululwe.

14 Ekyo kityo olw'okubba oku kyalo kunu tubulaku kibuga ky'emirembe n'emirembe, wazira tunoonia kiikyo ekyaba okwiza eky'omwigulu.

15 Kale tuwengeyo eeri oKibbumba esadaaka ey'okumuwuujja, nga tugibitya mu Yesu, nga bulijo tubbutula tuti oKibbumba niye oMusengwa.

16 Era timwerabiranga okukola ebintu ebisa, n'okubbeerangana ng'abaikirirya ba Yesu. Ebyo niibyo esadaaka egisangaalya oKibbumba.

17 Muwulisisyenge abeekubbemberi baanywe, era mubagonderenge, olw'okubba niibo abal-abirira emyoyo gyanywe, ng'abantu oKibbumba ababuulya ebifa oku myoyo egyo. Mubayezyesye okukikolanga n'eisangaalo, neye tina mwoyo wa nakolantya, olw'okubba ekyo mpaawo ky'ekibagasa inywe.

18 Mutusabirenge, olw'okubba tumaite tuti tituwulira musango omu myoyo gyaiswe era bulijo tutaka okukola kusani mu buli kimo.

19 Era mbegairira okunsabiranga eino, kaisi njezye okwira mangu egimuli.

20 Kale nsaba nti oKibbumba oyo atuwa eidembe, eyazuukizire oMusengwa waiswe oYesu, oMuliisya w'entaama omukulu, n'akakasa endagaano ey'emirembe n'emirembe, n'omusaayegwe,

21 abawe nabuli kisa kyonakyona ekimwetaaga okukolanga ebyataka. OKibbumba oyo akolere mwiswe byonabyona ebyasiima, ng'abitira omu Yesu Kurisito, awomeire okumuwanga ekitiisya emirembe n'emirembe. Amiina.

22 Boluganda, mbasaba muguminkirize ebimbalaabbiire, olw'okubba ebbaluwa eenu ngibawandiikiire mu bumpi.

23 Mbakobera nti owoluganda oTemuseewo bamuteereire okuzwa omu mabbuusuu. Era oweyaliiza mangu, twaliiza swenaswena okubabona.

24 Munsugirirye abeekubbemberi baanywe bonabona, n'abatuu kirirye bonabona. Aboluganda abazwa omu kyalo ky'e Itale babasugiirye.

<sup>25</sup> OKibbumba abakwatirenge ekisa inywe nywenanywena. Amiina.

**ENdagaano eMpyaka oMu Lugwere**  
**Gwere: Endagaano Empyaka Omu Lugwere (Bible)**

copyright © 2017 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2025-05-03

---

PDF generated using Haiola and XeLaTeX on 2 May 2025 from source files  
dated 3 May 2025

03698e2d-9c8d-5b1f-bc49-b0066e860180